

考工典

考工典第四十卷

宮殿部彙考二

後漢

光武帝建武十四年起南宮前殿 按後漢書光武本紀建武元年七月圖朱鮪於洛陽九月朱鮪舉城降十月癸丑車駕入洛陽幸南宮却非殿遂定都焉十四年正月起南宮前殿 注蔡質漢官典職云南宮至北宮中央作大屋複道三道行天子從中道從官夾道左右十步一衛兩宮相去七里又洛陽宮闔名有却非殿

按括地志南宮在雒州雒陽縣東北二十六里洛陽故城中

建武十九年冬十二月修西京宮室 按後漢書光武本紀云云 按杜篤傳篤以關中表裏山河先帝舊京不宜改營洛邑乃上論都賦曰皇帝以建武十八年二月甲辰升輿洛邑巡於五嶽推天時順斗極排闥闔入函谷觀阨於轂鼉圖險於隴蜀其三月丁酉行至長安經營宮室傷愍舊京遂天旋雲遊造舟於渭北旂涇流衍陳於岐梁東橫乎大河瘞后土禮郊明年有詔復函谷關作大

駕宮

明帝永平三年起北宮 按後漢書明帝本紀云云

永平八年冬十月北宮成 按後漢書明帝本紀云云 按鍾離意傳永平三年夏旱而大起北宮

意詣闕上疏帝勅大匠止作諸宮減省不急遂應時注雨後德陽殿成百官大會帝思意言謂公卿

曰鍾離尙書在此殿不立 注漢宮殿名北宮中有德陽殿

按禮儀志注蔡質漢儀曰正月旦天子幸德陽殿臨軒公卿將大夫百官各陪朝賀蠻貊胡羌朝貢畢見屬郡計吏皆陛觀庭燎宗室諸劉雜會萬人以上大官賜食酒御史四人執法殿下虎賁羽林弧弓撮矢陛戟左右戎頭偃脰陪前向後左右中郎將住東西羽林虎賁將東北五官將中央悉坐就賜作九賓徹樂鐘磬並作樂畢作魚龍曼延小黃門吹三通謁者引公卿羣臣以次拜罷德陽殿周旋容萬人階高一丈皆文石作壇激沼水於殿下畫屋朱梁玉階金柱刻鏤作宮掖之好厠以青翡翠一柱三帶韜以赤緹天子正旦節會朝百僚於此

順帝陽嘉元年修飾宮殿立長秋宮 按後漢書順帝本紀是歲修飾宮殿 按順烈梁皇后紀陽

嘉元年春有司奏立長秋宮以乘氏侯商先帝外戚春秋之義娶先大國梁小貴人宜配天祚正位坤極帝從之乃於壽安殿立貴人爲皇后

注壽安是德陽宮內殿名

桓帝延熹二年考濯龍宮

按後漢書桓帝本紀不載

按玉海延熹二年飾芳林而考濯龍之

宮

注

薛綜注東京賦云濯龍殿名芳林謂兩旁樹木蘭也考成也既成而祭之左傳曰考仲子之

宮

靈帝中平二年造萬金堂於西園

按後漢書靈帝本紀云云

中平三年修玉堂殿

按後漢書靈帝本紀三年春二月復修玉堂殿鑄銅人四黃鍾四及天祿蝦

蟆

注

天祿獸也時使掖庭令畢嵐鑄銅人列於蒼龍元武闕外鍾懸於玉堂及雲臺殿前天祿蝦

蟆吐水於平門外案今鄧州南陽縣北有宗資碑旁有兩石獸鑑其膊一曰天祿一曰辟邪據此

卽天祿辟邪竝獸名也漢有天祿閣亦因獸以立名

魏

文帝黃初元年冬十二月初營洛陽宮

按魏志文帝本紀云云

注

臣松之案諸書記是時帝居

北宮以建始殿朝羣臣門曰承明陳思王植詩云謁帝承明廬是也至明帝時始於漢南宮崇德殿處起太極昭陽諸殿

按水經注孫盛魏春秋曰黃初元年文帝愈崇宮殿雕飾觀閣取白石英及紫石英及五色大石於太行穀城之山起景陽山於芳林園樹松竹草木捕禽獸以充其中於是百役繁興帝躬自掘土率羣臣三公已下莫不展力山之東舊有九江陸機洛陽記曰九江直作員水水中作員壇三破之夾水得相逕通賦曰濯龍芳林九谷八溪芙蓉覆水秋蘭被崖今也山則塊阜獨立江無復髣髴矣渠水又東枝分南入華林園歷疏圃南圃中有古井井悉以珉玉爲之以磁石爲口工作精密猶不變古璨然如新又瑤華宮南歷景陽山北山在都亭堂上結方湖湖中起御坐石也御坐前建蓬萊山曲池接筵飛沼拂席南面射侯夾席武峙背山堂上則石路崎嶇巖嶂峻嶮雲臺風觀纓帶阜遊觀者升降霞閣出入虹陞望之狀晁沒鸞舉矣其中引水飛舉傾瀾瀑布或枉渚聲溜潺潺不斷竹柏蔭於層石繡薄叢於泉側微飈暫拂則芳溢於六空入爲神居矣其水東注天池池中有魏文帝九花叢殿基悉自洛中故碑累之今造釣臺於其上池南置魏文帝茅茨堂前有茅茨碑是黃初中

所立也其水自天淵池東出華林園逕聽訟觀南故平望觀也魏明帝常言獄天下之命也每斷大獄恆幸觀聽之以太和三年更從今名

明帝太和六年秋七月治許昌宮起景福承光殿 按魏志明帝本紀云云 按水經注許昌城

有景福殿基魏明帝太和中造

青龍三年春三月大起洛陽宮殿 按魏志明帝本紀三年三月大治洛陽宮起昭陽太極殿築總

章觀百姓失農時直臣楊阜高堂隆等各數切諫雖不能聽帝優容之秋七月洛陽崇華殿災八月

丁巳命有司復崇華改名九龍殿 按楊阜傳明帝新作許昌宮又營洛陽宮殿觀閣阜上疏曰堯

尚茅茨而萬國安其居禹卑宮室而天下樂其業及至殷周或堂崇三尺度以九筵耳古之聖帝明

王未有極宮室之高麗以彫弊百姓之財力者也桀作璇室象廊紂爲傾宮鹿臺以喪其社稷楚靈

以作章華而身受其禍秦始皇作阿房而殃及其子天下叛之二世而滅夫不度萬民之力以從耳

目之欲末有不亡者也陛下當以堯舜禹湯文武爲法則夏桀殷紂楚靈秦皇爲深誠高高在上實

鑒后德慎守天位以承祖考巍巍大業猶恐失之不夙夜敬止允恭卹民而乃自暇自逸惟宮臺是

侈是飾必有顛覆危亡之禍易曰豐其屋蔀其家闕其戶闕其無人王者以天下爲家言豐屋之禍至於家無人也方今吳蜀合從謀危宗廟十萬之軍東西奔赴邊境無一日之娛農夫廢業民有饑色陛下不以是爲憂而營作宮室無有已時恐皇祖烈考之祚將墜於地也奏御天子感其忠言手筆詔答 按魏略是年起太極諸殿築總章觀高十餘丈建翔鳳於其上又於芳林園中起陂池楫櫂越歌又於列殿之北立八坊諸才人以次序處其中貴人夫人以上轉南附焉其秩石擬百官之數帝常游宴在內乃選女子知書可付信者六人以爲女尙書使典省外奏事處當書可自貴人以下至尙保及給掖庭灑掃習伎歌者各有千數通引穀水過九龍前爲玉井綺欄蟾蜍含受神龍吐出使博士馬均作司南車水轉百戲歲首建巨獸魚龍曼延弄馬倒騎備如漢西京之制築閭闔諸門闕外累置太子舍人張茂以吳蜀數動諸將出征而帝盛興宮室留意於玩飾賜與無度帑藏空竭乃上書切諫 按水經注魏明帝上法太極於洛陽南宮起太極殿於漢崇德殿故處魏武封於鄴爲北宮宮有文昌殿按洛陽宮殿簿魏有太極九龍芙蓉九華承光諸殿

大帝赤烏十年春三月改作太初宮 按吳志吳主傳云云

注江表傳載權詔曰建業宮乃朕從

京來所作將軍府寺耳材柱率細皆以腐朽常恐損壞今未復西可徙武昌宮材瓦更繕治之有司奏言曰武昌宮已二十八歲恐不堪用宜下所在通更伐致權曰大禹以卑宮爲美今軍事未已所在多賦若更通伐妨損農桑徙武昌材瓦自可用也

按建康宮殿簿太初宮中有神龍殿去縣三里左太冲吳都賦云抗神龍之華殿是也赤烏殿在縣東北五里吳昭明宮內制度上應星宿

孫亮建興元年天災武昌端門改作端門又災內殿 按吳志孫亮傳云云 注臣松之案孫權赤

烏十年詔徙武昌宮材瓦以繕治建康宮而此猶有端門內殿 吳錄云諸葛恪有遷都意更起

武昌宮今所災者恪所新作

孫皓寶鼎二年夏六月起顯明宮冬十二月皓移居之 按吳志孫皓傳云云 注吳有太初宮方

三百丈權所起也昭明宮方五百丈皓所起也避晉諱故曰顯明在太初之東

晉

成帝咸和五年九月造新宮 按晉書成帝本紀云云

咸和八年春正月以新宮成赦五歲刑以下 按晉書成帝本紀七年十二月庚戌帝遷於新宮八

年春正月辛亥朔詔曰昔大賊縱暴宮室焚蕩元惡雖翦未暇營築有司屢陳朝會逼狹遂作斯宮
子來之勞不日而成既獲臨御大饗羣后九賓充庭百官象物知君子勤禮小人盡力矣思蠲密網

咸同斯會其赦五歲刑以下

孝武帝太元三年二月作新宮 按晉書孝武帝本紀云云 注新宮內外殿宇大小三千五百間

按晉紀孝武寧康二年尙書令王彪之等改作新宮太元三年二月內外軍六千人始營築至七月
而成太極高八丈長二十七丈尙書謝萬監視賜爵關內侯大匠毛安之關內侯 按冊府元龜

孝武太元三年二月作新宮帝移居會稽王邸七月帝入新宮 注先是謝安輔政宮室毀壞安欲

繕之尙書令王彪之等以外寇爲諫安不從竟獨決之宮室用成皆仰模元象合體辰極兩無勞

怨

太元十七年秋八月新作東宮 按晉書孝武帝本紀云云

太元二十一年春正月造清暑殿夏四月作永安宮 按晉書孝武帝本紀云云 按洛陽宮殿名永安宮周回六百九十八丈故基在洛陽故城中

宋

文帝元嘉十五年秋七月辛未新作東宮 按南史宋文帝本紀云云

元嘉二十五年夏四月乙巳新作閭闔廣莫二門改先廣莫門曰承明開陽曰津陽 按宋書文帝本紀云云

元嘉三十年六月初置殿門及上閣 按宋書孝武帝本紀云云

孝武帝大明七年於博望梁山立雙闕 按宋書孝武帝本紀云云

大明 年起玉燭殿 按宋書武帝本紀孝武大明中壞上所居陰室於其處起玉燭殿與羣臣觀之牀頭有土障壁上葛燈籠麻繩拂侍中袁顥盛稱上儉素之德

廢帝永光元年八月以石頭城爲長樂宮東府城爲未央宮北邸爲建章宮南第爲長楊宮 按宋書廢帝本紀云云

齊

武帝永明元年春正月甲子築青溪舊宮 按南史齊武帝本紀云云

廢帝永元三年大起諸殿 按南史齊廢帝本紀三年火燒璿儀曜靈等十餘殿及柏寢北至華林西至祕閣三千餘間皆盡左右趙鬼能讀西京賦云柏梁既災建章是營於是大起諸殿芳樂芳德仙華大興含德清曜安壽等殿又別爲潘妃起神仙永壽玉壽三殿皆市飾以金璧其玉壽中作飛仙帳四面繡綺窗間盡畫神仙又作七賢皆以美女侍側鑿金銀爲書字靈獸神禽風雲華炬爲之玩飾椽桷之端悉垂鈴佩江左舊物有古玉數枚悉裁以鈿笛莊嚴寺有玉九子鈴外國寺佛面有光相禪靈寺塔諸寶珥皆剝取以施潘妃殿飾

梁

武帝天監六年九月改闕武堂爲德陽堂聽訟堂爲儀賢堂 按梁書武帝本紀云云

天監七年春正月戊戌作神龍仁虎闕於端門大司馬門外 按梁書武帝本紀云云

天監十年初作宮城門三重樓及開二道 按南史梁武帝本紀云云

天監十二年春二月新作太極殿 按梁書武帝本紀十二年春二月辛巳新作太極殿改爲十三間六月庚子太極殿成

大通元年春正月開大通門 按南史梁武帝本紀初帝創同泰寺至是開大通門以對寺之南門取反語以協同泰自是晨夕講義多由此門

敬帝太平元年十一月起雲龍神武門 按南史梁敬帝本紀云云

陳

高祖永定二年秋七月詔起太極殿冬十月甲寅太極殿成 按陳書高祖本紀二年秋七月初侯景之平也火焚太極殿承聖中議欲營之獨闕一柱至是有樟木大十八圍長四丈五尺流洎陶家後渚監軍鄒子度以聞詔中書令沈衆兼起部尙書少府卿蔡儔兼將作大匠起太極殿十二月丙寅高祖於太極殿東堂宴羣臣設金石之樂以路寢告成也

高宗太建四年十二月丁卯詔築東宮 按陳書高宗本紀四年十二月丁卯詔曰梁氏之季兵火薦臻承華焚蕩頓無遺構寶命惟新迄將二紀頻事戎旅未遑修繕今工役差閑椽楹有擬來歲開

肇創築東宮可權置起部尙書將作大匠用主監作

太建七年六月己酉改作雲龍神虎門 按陳書高宗本紀云云

太建九年十二月戊申東宮成皇太子移於新宮 按陳書高宗本紀云云

後主至德二年建臨春結綺望仙三閣 按陳書後主本紀不載 按皇后列傳史臣侍中鄭國公魏徵考覽記書參詳故老云後主初卽位以始興王叔陵之亂被傷臥於承香閣下時諸姬並不得進唯張貴妃侍焉而柳太后猶居柏梁殿卽皇后之正殿也後主沈皇后素無寵不得侍疾別居求賢殿至德二年乃於光照殿前起臨春結綺望仙三閣閣高數丈並數十間其窗牖壁帶懸楣欄檻之類並以沈檀香木爲之又飾以金玉間以珠翠外施珠簾內有寶牀寶帳其服玩之屬瑰奇珍麗近古未有每微風暫至香聞數里朝日初照光映後庭其下積石爲山引水爲池植以奇樹雜以花藥後主自居臨春閣張貴妃居結綺閣龔孔二貴嬪居望仙閣並複道交相往來

北魏

太祖登國六年起河南宮 按魏書太祖本紀云云

天興元年冬十月起天文殿 按魏書太祖本紀元年秋七月遷都平城始營宮室建宗廟立社稷冬十月起天文殿 按冊府元龜天興元年正月帝至鄴巡登臺榭徧覽宮城將有定都之意秋七月遷都平城始營宮室建宗廟立社稷冬十月起天文殿

天興二年秋七月起天華殿 按魏書太祖本紀秋七月起天華殿冬十二月天華殿成

天興三年秋七月起中天殿及雲母堂金華室 按魏書太祖本紀云云

天興四年夏五月起紫極殿 按魏書太祖本紀云云

天興六年冬十月起西昭陽殿 按魏書太祖本紀云云

天賜元年冬十月築西宮 按魏書太祖本紀云云

天賜三年夏六月築溫南宮 按魏書太祖本紀三年六月發八部五百里內男丁築溫南宮門闕高十餘丈引溝穿池廣苑囿規立外城方二十里分置市里經途洞達三十日罷

太宗神瑞元年春二月起豐宮於平城東北 按魏書太宗本紀云云

泰常三年冬十月戊辰築宮於西苑 按魏書太宗本紀云云

古今圖書集成
泰常四年春三月築宮於蓬臺北九月築宮於白登山 按魏書太宗本紀云云

泰常八年廣西宮 按魏書太宗本紀八年冬十月廣西宮起外垣牆周回二十里

世祖始光二年營萬壽宮起永安安樂二殿 按魏書世祖本紀二年三月庚申營故東宮爲萬壽宮起永安安樂二殿臨望觀九華堂初造新宇千餘九月永安安樂二殿成丁卯大饗以落之

神䴥四年秋七月起承華宮 按魏書世祖本紀云云

延和三年秋東宮成 按魏書世祖本紀三年秋七月辛巳東宮成備置屯衛三分西宮之一

太平眞君三年作廣德殿 按魏書世祖本紀三年劉義隆龍驤將軍裴方明梁州刺史劉康祖寇南秦南秦王楊難當敗奔於上邽六月丙戌難當朝於行宮先是起殿於陰山之北殿始成而難當至因名曰廣德焉

太平眞君十一年二月大治宮室太子居於北宮 按魏書世祖本紀云云

高宗太安三年起遼西行宮 按魏書高宗本紀三年冬十月將東巡詔太宰常英起行宮於遼西

黃山

太安四年三月丙辰起太華殿九月辛亥太華殿成 按魏書高宗本紀云云

顯祖皇興五年名太上皇帝宮曰崇光 按魏書顯祖本紀五年秋八月丁亥車駕還宮帝雅薄時務常有遺世之心丁未詔百官有司祇奉嗣子以答天休於是羣公奏上尊號太上皇帝乃從之己酉太上皇帝徙御崇光宮 按册府元龜獻文皇興五年八月傳位於太子帝稱太上皇帝徙御崇光宮采椽不斲土階而已初帝於苑內立殿勅中祕羣官製名儀曹郎公孫叡奏曰臣聞至尊至貴莫崇於帝王天人挹損莫大於謙光伏惟陛下躬唐虞之德存道頤神逍遙物外宮居之名當協叡旨臣愚以爲宜曰崇光奏可

高祖延興三年改崇光宮爲寧光宮 按魏書高祖本紀云云
承明元年十月起七寶永安行殿 按魏書高祖本紀云云

太和元年起太和安昌二殿及永樂殿 按魏書高祖本紀元年春正月起太和安昌二殿秋七月己酉太和安昌二殿成九月庚子起永樂遊觀殿於北苑穿神淵池 按册府元龜太和元年正月起太和安昌二殿詔曰昔軒皇誕御垂棟宇之構爰歷三代興宮觀之式然茅茨土階昭德於上

代增臺殿屢崇威於中葉良繇文質異宜華朴殊禮故也是以周成繼業營明堂於東都漢祖事興建未央於咸鎬蓋所以尊嚴皇威崇重帝德豈好奢惡儉苟弊民力者哉國家皇運統天協纂乾曆銳意四方靡遑建制宮室之度頗爲未允太祖初基雖粗有經式自茲厥後復多營改至於三元慶饗萬國充庭觀光之使具瞻有闕朕以寡德猥承洪緒時屬休期事鍾昌運宜遵遠度式茲宮宇指訓規模事昭於平日明堂太廟已成於昔年又因往歲之豐資藉民情之安逸將以今春營改正殿違犯時令行之惕然但朔土多寒事殊南夏自非裁度經春興役徂暑則廣制重基莫繇克就成功立事非委賢莫可改制規模非任能莫濟尙書李冲器懷淵博經度明遠可領將作大匠司空長宮樂穆亮可與大匠共監興繕其去故從新之宜修復太極之制朕當別加指授七月二殿成起朱明思賢門

太和三年春正月癸丑坤德六合殿成六月作文石室靈泉殿於方山 按魏書高祖本紀云云

太和四年春正月癸卯乾象六合殿成九月乙亥思義殿成壬午東明觀成 按魏書高祖本紀云

云